

- *1. شیر کشمیر بین القوامی مرکز مانہ پلک عمر عبداللہ جموں کشمیر غا وزیر اعلیٰ غے طور ور حلف لیں گا اس ضمن مانہ تمام تیاریاں نانہ حتمی شکل دے دتی گئی ہے۔
- *2. وزیر اعظم نریندر مو دی نے جدیدیاتی ٹیکنالوجی واسطے عالمی لائحہ عمل شروع کرن با رے کہیو ہے۔
- *3. ملک ڈاکٹر اے پی جے عبدالکلام نانہ اُن غا جنم تہاڑا غا موقعہ ور خراج تحسین پیش کر رہیو ہے۔
- *4. تے وزیر خارجہ 23 واں شہنگانی تعاون تنظیم غا اجلاس مانہ شرکت کرن واسطے اج پاکستان غا دوروزہ دورہ ور اسلام آباد پُج گیا ہیں۔

خبران غی تفصیل نال پہلاں عبید الرحمن ۔

Swearing In Ceremony Security

شیر کشمیر بین القوامی کا نفرنس مرکز مانہ پلک عمر عبداللہ جموں کشمیر غا وزیر اعلیٰ غے طور ور حلف لیں گا۔ اس ضمن مانہ اس مرکز غے کول کال حفاظتی صورتحال غا بندوبست نانہ حتمی شکل دے دتی گئی ہے۔ واضع رہ جے پلک 11 بج غے 30 منٹ ور لیفٹنٹ گورنر منوج سنہا عمر عبداللہ تے اِن غی کونسل مانہ وزارت غو عہدو سنہالان آلاں غی حلف برداری تقریب غی صدارت کریں گا۔ اس سلسلہ مانہ اک سینئر حفاظتی افسر نے دسیو ہے جے کڑا توں کڑا حفاظتی بندوبست کیا گیا ہیں۔ اُن غومزید کہنو تھو جے اس ضمن مانہ تیاریاں غو جانزو وی لیو گیو ہے۔ واضع رہ جے پچھلے ہفتے جمعہ آلے تہاڑے عمر عبداللہ نے لیفٹنٹ گورنر منوج سنہا سنگ ملاقات کر غے سرکار بنان غو داعوو پیش کیو تھو۔ اس ضمن مانہ صدر جمہو ریہ درویدی مُرمو نے اک نوٹیفکیشن جاری کر غے جموں کشمیر توں صدر راج نانہ ختم کرن با رے دسیو تھو۔ قابل ذکر ہے جے حالیہ منعقد ہوا اسمبلی انتخابات مانہ نیشنل کانفرنس، کانگریس اتحاد نے 90 سیٹاں ورچوں 48 ور جیت درج کی تھی۔ جد کہ بی جے پی نے جموں خطہ مانہ اپنو اثر رسوخ دستاں واں 29 سیٹاں ور کامیابی حاصل کی تھی۔ پلک حلف برداری تقریب اک تاریخی تقریب وے گی۔ جس سنگ 6 سال غے قریب مرکز راج غو اختتام وے گو تے ات اک چُنی وی سرکار اقتدار مانہ آوے گی۔

PM WTSA

وزیر اعظم نریندر مو دی نے اج بین القوامی مواصلاتی تنظیم ڈبلیو ٹی ایس اے 2024 غو نوی دہلی غا بھارت منڈپ مانہ افتتاح کیو۔ اقوام متحدہ غی یاہ ایجنسی بین القوامی مواصلاتی نظام غا معیار تے کم کاج ور نظرت رکھے۔ ایشیا بحر الکاہل خطہ غے اندر بھارت پہلو ایسو ملک ہے جہیڑو ڈبلیو ٹی ایس اے پروگرام غی میزبانی کر رہیو ہے۔ اس پروگرام غے دوران جناب مو دی بھارت مو بانیل کانگریس 2024 غا 8 واں ایڈیشن غو وی افتتاح کریں گا۔ اس موقعہ ور بولتاں واں جناب مو دی نے کہیو کہ بھارت غے اندر اس وقت تقریباً 120 کروڑ افراد مو بانیل فون غو استعمال کریں جن مانہ 95 کروڑ انٹرنیٹ وی استعمال کریں۔ انہاں نے کہیو کہ بھارت غو ڈیجیٹل نظریو 4 ستوناں ور کم کرے جن مانہ سستا آلا ملک غا ہر کونہ تک نیٹ ورک غی رسائی وغیرہ شامل ہیں۔ انہاں نے کہیو کہ ڈبلیو ٹی ایس اے اک عالمی سطح غو پروگرام ہے جس مانہ تقریباً 190 ملکاں غا نمائندہ تے ماہرین شامل وین۔ بھارت غی میزبانی ملک غے اندر مواصلاتی

نظام غا مستقبل واسطے اہم قدم ہے۔ جس نال مُلک غے اندر کئی شعباں نانہہ براہ راست فاندو حاصل وے گو۔

Prez Algeria Visit

صدر جمہوریہ دریدی مُرمو اج الجیریہ غو 3 روزہ دورو مکمل کریں گی۔ 3 مُلکاں غا اس دورہ غے دوران وے کئی پروگراماں مانہہ شرکت کریں گی۔ اج سویرے صدر جمہوریہ نے سابقہ صدر ڈاکٹر اے پی جے عبدالکلام غا یوم پیدائش ور پُھلاں غا گلدستہ نال خراج عقیدت پیش کیو۔ اس دوران غے دوران صدر جمہوریہ سیدھی عبداللہ سائینس تے ٹیکنالوجی پولے یونیورسٹی مانہہ خطاب کریں گی۔ سمندری پانی مانہہ موجود نمکیات نانہہ ختم کرن آلا پروجیکٹ غو دورو کرن تیں بعد وے تیزا واسطے روانہ ہو جائیں گی۔ اس دوران وے ہما باغ غو دورو لا غے ات اک پودو لا ویں گی۔ اس دورہ غا دوجا مرحلہ مانہہ صدر جمہوریہ آئندہ روز موریتانیہ واسطے روانہ ہو جائیں گی تے 17 تیں 19 اکتوبر تک اس دورہ غا تیجا مرحلہ مانہہ وے ملاوی غو سفر کریں گی۔ اس دوران وے مذکورہ مُلکاں اندر بسیا بھارتیہ شہریاں نال وی ملاقات کریں گی۔ اور مُلکاں غا آپسی رابطاں متعلق وی تبادلہ خیال کیو جائے گو۔ اس دورہ غو مقصد بھارت تے افریقی مُلکاں غا تال میل نانہہ مزید مضبوط بنانو ہے۔

Shah Narco Trade

گجرات مانہہ 5 ہزار کروڑ روپیاں غی قیمت غی نشہ آور کوکین ضبط کرن غا اک تہاڑے بعد مرکزی وزیر داخلہ امت شاہ نے پچھلے تہاڑے کہیو ہے جے منشیات فروشاں تے منشیات غے خلاف کارروائی بغیر سستی غے جاری رہے گی۔ جناب شاہ نے کہیو ہے مو دی حکومت بھارت نانہہ منشیات تے توں پاک مُلک بنان غے نال نال نوجواناں نانہہ منشیات توں دور رکھن غی وعدہ بند ہے۔ انہاں نے کہیو ہے ہوں دہلی پولیس نانہہ گجرات پولیس سنگ حالیہ 5 ہزار کروڑ روپیاں غی کوکین ضبط کرن تے کل 13 ہزار کروڑ غی قیمت غی منشیات نانہہ کامیابی سنگ ضبط کرن ور مبارکباد دیوں۔ واضع رہے جے اتوار آئے تہاڑے دہلی پولیس تے گجرات پولیس نے اک سانجھی کارروائی مانہہ آنکیشور گجرات اندر 5 سو 18 کلو کوکین نانہہ ضبط کیو تھو جس غی قیمت 5 ہزار کروڑ روپیہ ہے۔

India Australia

بھارت اسٹریلیا غی چوتھی 2 جمع 2 سیکریٹری سطح غی ملاقات اج نوی دہلی مانہہ منعقد ہوئی۔ خارجہ امور غی وزارت نے دسیو ہے جے بھارتیہ وفد غی سربراہی دفاعی سیکریٹری ارمانے گریڈھر تے خارجہ سیکریٹری وکرم مصری کر رہیا تھا۔ اس ملاقات غے دوران بہت سارا سیاسی، دفاعی تے حفاظتی معاملات ور تبادلہ خیال کیو گیو۔ دوہاں مُلکاں نے بحر الکاہل علاقہ مانہہ امن تے ترقی خاطر شروع کیا گیا منصوباں نانہہ ویلے سرے مکمل کرن غا اہداف ور زور پایو اور دوہاں مُلکاں بشکار آپسی رابطاں نانہہ مزید مضبوط کرن غی یقین دہانی کرائی گئی۔

LG VC

لیفٹنٹ گورنر منوج سنہا جہیڑا جے بابا غلام شاہ بادشاہ یونیورسٹی راجوری تے کلکٹر یونیورسٹی جموں غا چانسلر وی ہیں نے پروفیسر جاوید اقبال تے پروفیسر کے ایس چندر شیکھر نانہہ بابا غلام شاہ بادشاہ یونیورسٹی تے کلکٹر یونیورسٹی جموں غو وائس چانسلر غا عہدہ ور تقرری کی ہے۔ اس تقرری غی مدت عہدو سنبھال تیں لے گے 3 سال مکمل ہون تک وے گی۔

واضع رہے جاوید اقبال علی گڑھ مسلم یونیورسٹی مانہہ مغربی ایشیائی تے شمالی افریقن سٹڈیز غا پروفیسر بین جد کہ کے ایس چندر شیکھر کیرلہ یونیورسٹی مانہہ سینئر پروفیسر بین۔

یہ خبر تم آکاشوانی جموں تیں سن رہیا ہیں خبراں غا باقی حصہ نال محبوب سلطانی۔

APJ Kalam Birth Anniversay

اج سابق صدر جمہوریہ ڈاکٹر اے پی جے عبدالکلام غو جنم تہاڑو ہے۔ سابق صدر اس تہاڑے سال 1931 مانہہ تامل ناڈو غا شہر رامیسورم مانہہ پیدا ہوا تھا۔ انہاں نانہہ بھارت غا میزائل مین غے طور ور وی جانیو جائے۔ انہاں نے پروجیکٹ ڈائریکٹر غے طور ور بھارت غی پہلی تیار کی جان آلی سیٹ لائیٹ لائچ کرن آلی گڈی نانہہ تیار کرن اپنی خدمات دتی تھیں۔ جناب عبدالکلام اسرو غی طرفوں شروع کیا گیا ویکل پروگرام تے خاص طور ور پی ایس ایل وی غی ترتیب غا وی ذمہ دار تھا۔ اسرو مانہہ دو دبائیاں تک کم کرن توں بعد جناب کلام نے بھارت غی غی تیار کی جان آلی میزائل غی ذمہ داری تے اگنی تے پرتھوی میزائل غی ترقی تے کا روائیاں مانہہ وی اہم کردار ادا کیو۔ وے بھارت غا سب تیں ممتاز سائنسداناں وچوں اک ہیں جنہاں نے 30 یونیورسٹی تے اداراں نے ڈاکٹری غی اعزازی ڈگری توں نوازیو اس تیں علاوہ انہاں نے پدم بھوشن، پدم ویبھوشن تے بھارت غو سب تیں بڑو شہری اعزاز بھارت رتن توں وی نوازیو گیو تھو۔ تے سال 2002 مانہہ بھارت غا 11 واں صدر وی بنیا تھا۔

PM Abdul Kalam

وزیر اعظم نریندر مودی نے سابق صدر جمہوریہ ڈاکٹر اے پی جے عبدالکلام نانہہ ان غا جنم تہاڑا غا موقعہ ور خراج تحسین پیش کیو ہے۔ اپنا سماجی میڈیا پیغام مانہہ جناب مودی نے کہیو جے سابق صدر جمہوریہ غی سوچ تے نظریو ملک نانہہ وکست بھارت غا ہدف حاصل کرن مانہہ خاصی مدد کرے گو۔

Jaishanker SCO

خارجہ امور غا وزیر ایس جے شنکر اج بعد دوپہر پاکستان غا 2 روزہ دورہ ور روانہ ہو گیا ہیں۔ جت وے 23 واں شہنگائی تعاون تنظیم اجلاس مانہہ شرکت کریں گا۔ پاکستان غی صدارت مانہہ یاہ میٹنگ کل منعقد وے گی۔ اس میٹنگ غو مقصد تنظیم غا اقتصادی تے تجارتی معاملات ور تبادلہ خیال کرنو ہے۔ اس میٹنگ مانہہ بھارت غا وزیر خارجہ ملک غی نمائندگی کریں گا۔

Kishtwar Fire

جموں کشمیر انتظامیہ نے تمام متعلقہ ایجنسیاں نانہہ ہدایت دتی ہے جے وے ضلع کشتواڑ غا ما لواریون گراں مانہہ اگ لگن نال متاثر ہوا افراد غی ہر ممکن مدد کریں اور زمینی سطح ور موثر اقدام کریں۔ واضع رہ کہ ضلع کشتواڑ مانہہ گذشتہ روز بعد دوپہر سوکھا گھاس نانہہ اگ لگی جہیڑی تیز ہوا نال پھیلتی وی گراں تک آپچی۔ اس واقعہ مانہہ گراں غا تقریباً 70 کہر سڑ غے سچی ہو گیا ہیں۔ اس تیں علاوہ مال مویشی واسطے بنایا گیا تقریباً 30 ٹارا وی اگ غی نظر ہو گیا ہیں۔ اس ضمن مانہہ کشتواڑ غا ڈپٹی کمشنر راجیش کمار شون نے متاثرہ کُنیاں واسطے 5/5 لکھ روپیاں غی امدادی رقم واگزار کرن غو اعلان کیو ہے۔ اس حادثہ مانہہ کوئی جانی نقصان نہیں ہوو۔ البتہ کُجھ جانور اگ غی زد مانہہ آیا ہیں۔ بھارتیہ فضائیہ نے متاثرہ افراد غی مدد تے راحت واسطے علاقہ غے اندر ہیلی کاپٹر خدمات وی مہیا کرائی ہے۔

GoC Rajouri

فوج غی 16 کو ر غا کمانڈینگ بارے جنرل افسر نے پچھلے تہاڑے راجو ری ضلع مانہ قبضہ لکیر غا اگلا علاقہ غو دورو لا غے جوانان غی طرفوں کا روانیاں واسطے تیاریاں غو جانزو لیو ہے۔ اس موقعہ ور 16 کو ر غا جی او سی نوین سچدیوا نے اک کمیونٹی تعلیمی مرکز غو وی افتتاح کیو۔ واٹ ناٹ کو ر نے اک سماجی میڈیا غے ذریعے دسیو ہے جے لیفٹنٹ جنرل سچدیوا نے راجو ری غا جہنگر علاقہ مانہ قبضہ لکیر غی اگلی جگہاں غو دورو کیو ہے۔ انہاں نے جوانان غی کسے وی دقت غا حل واسطے لگن تے پیشہ وارانہ طور تیار بن بارے تعریف وی کی۔

Dharmendra India US Summit

وزیر تعلیم دھرمیندر پر دھان نے کہیو ہے جے قومی تعلیمی پالیسی غو مقصد طالب علمان بشکار اک عالمی ذمہ دار شہری تے بدف نامہ پیدا کرنو ہے۔ انہاں نے انہاں گلاں غو اظہار پچھلے تہاڑے نوی دہلی مانہ بھارتی قیادت بارے اجلاس غے دوران بولتاں واں کیو۔ اس تقریب غو انعقاد امریکہ بھارت شراکت داری سمجھوتہ غا فورم نے کیو تھو۔ اس موقعہ ور وزیر تعلیم نے قومی تعلیمی پالیسی غا نفاذ غا 5 سال پورا ہون ور تعریف کی۔ انہاں نے اس گل ور زور پایو جے عالمی ضابطہ غی معیاری تعلیم طالب علمان مانہ فراہم کی جانی چاہیے۔ جناب پردھان نے کہیو جے وزارت بن طالب علمان نانہ ٹیکنالوجی غا بٹر غے نال بٹر حاصل کرن ور توجہ دے رہی ہے۔ انہاں نے ڈگری یاہ سرٹیفکیٹ ور قابلیت رکھن بارے وزیر اعظم نریندر مو دی غا زور نانہ وی آجاگر کیو۔

National Water Award

پنجواں قومی پانی اعزاز 2023 غو پچھلے تہاڑے اعلان کر دتو کیو ہے۔ اس ضمن مانہ اڑیسہ نے بہترین ریاست غا زمرہ مانہ پہلو مقام حاصل کیو ہے جد کہ اتر پردیش نے دوجو تے گجرات تے پڈوچری نے مشترکہ طور ور تیجو مقام حاصل کیو ہے۔ اس ضمن مانہ صدر جمہو ریہ اس مہینہ غی 22 تا ریخ نانہ نوی دہلی مانہ ان اعزاز سنگ نوازیں گی۔ اس تقریب مانہ گل 38 جتن آلاں نانہ ان اعزاز سنگ نوازیو جائے گو۔ جن مانہ 90 زمران اندر مشترکہ طور ور جتن آلا شامل ہیں۔ اس سلسلہ مانہ بکھ بکھ زمران مانہ اعزاز جتن آلاں نانہ ٹرافی تے نقد انعام وی دتا جائیں گا۔ اُنگان جل شکتی غا مرکزی وزیر سی آر پٹیل نے مثالی کم کر غے اعزاز جتن آلاں غی سراہنا کی ہے تے اُن غو کہنو تھو جے جل شکتی وزارت نے قومی سطح ور پانی نانہ بچان بارے بیداری مہم وی شروع کی ہے۔

اس غے نال ہی خبراں غو یوہ بلیٹن ختم ہوؤ۔